

Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat pillugu Namminersorlutik Oqartussat nalunaarutaat

Matumuuna Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. 39, 9. december 2015-imeersoq, Inatsisartut inatsisaata nr. 7, 19. november 2020-meersoq kingunerisaanik allannguutit ilanngullugit nalunaarutigineqarpoq.

Kapitali 1

Tuniniaanissamik nittarsaassinermi pitsaasumik ileqqoqarnissaq aamma atuuffissaa

Tuniniaanissamik nittarsaassinermi pitsaasumik ileqqoqarnissaq

§ 1. Inuussutissarsiornermik ingerlataqartut Inatsisartut inatsisaanni matumani pineqartunut ilaasut atuisut, inuussutissarsiornermik ingerlataqartut aammalu nalinginnaasumik inuiaqatigiinni soqutigisat eqqarsaatigalugit tuniniaanissamik nittarsaassinermi pitsaasumik ileqqoqarnermik takutitsissapput.

Imm. 2. Tuniniaanissamik nittarsaassineq atuisut aningaasaqarnikkut soqutigisaannut tunngassuteqartoq, taakkua aningaasaqarnikkut pissusilersornerannik ersarissumik equtitsinissamut tulluartsuussanngilaq.

Atuuffissaa

§ 2. Inatsisartut inatsisaat manna, nioqqutissat kiffartuussissutillu niuerfimmi neqeroortutigineqarsimappata, inuussutissarsiornermik suliaqartunut namminersortunut aamma pisortat suliffeqarfiinut atuuppoq.

Imm. 2. Inatsisartut inatsisaat aningaasarsianut sulinernullu atugassarititaasunut kiisalu ineqarnermut akiliutinut atuutinngilaq.

Imm. 3. § 1, § 3, § 14-15, § 18, § 19 kiisalu § 20 aningaasaqarnikkut suliaqarnermut, inatsisini allani pineqartunut ilaasumut, atatillugu atuutissanngillat.

Kapitali 2

Niuerfimmi pissusilersorneq pillugu maleruagassat nalinginnaasut

Uukapaatitsisumik assuarnartumillu tuniniaanissamik nittarsaassineq

§ 3. Inuussutissarsiummik ingerlataqartut, tamanna niuerfimmi atuisut imaluunniit inuussutissarsiummik ingerlataqartut allat aningaasaqarnikkut pissusilersornerannut malunnaateqarluartumik equtitsisinnaappat, paasissutissanik uukapaatitsisumik imaluunniit eqqunngitsumik allassimasunik atueqqusaanngillat imaluunniit paasissutissanik pingaaruteqartunik ilaatitsinngitsooqqusaanatik.

Imm. 2. Tuniniaanissamik nittarsaassineq imarisamigut, ilusimigut imaluunniit periaatsimi atorneqartumi uukapaatitsisoq, saassusserpalaartoq imaluunniit atuisunut imaluunniit inuussutissarsiummik ingerlataqartunut ileqqorissaanngitsumik sunniuteqartumik misigititsisoq, aammalu taakkua aningaasaqarnikkut pissusilersornerannut malunnaateqarluartumik equtitsisinnaasoq, akuerisaanngilaq.

Imm. 3. Pissusiviusut pillugit allassimasut eqqortuussusaat uppersarsarneqarsinnaassaaq.

Ussassaarutit suussusaat

§ 4. Ussassaarut, ilusaa apeqqutaatinnagu aammalu tusagassiuutini sorlarni saqqummersinneqarnerisapeqqutaatinnagu, ussassaarutitut ersarissumik paasineqartussanngorlugu saqqummersinneqassaaq.

Sanilliussilluni ussassaarutit

§ 5. Sanilliussilluni ussassaarut tassaavoq ussassaarut sunaluunniit toqqaannartumik imaluunniit toqqaannanngitsumik unammillertaasumut imaluunniit nioqqutissanut kiffartuussissutinullu unammillertaasumit neqeroorutigineqartunut innersuussisoq.

Imm. 2. Inatsisartut inatsisaat manna malillugu ussassaarutininik sanilliussineq akuerisaavoq, sanilliussineq:

- 1) uukapaatitsinngippat,
- 2) nioqqutissanut imaluunniit kiffartuussissutinut pisariaqartitsinernik assigiinnut imaluunniit assigiimmik siunertaqartunut tunngassuteqarpat,
- 3) kinaassusersiunngitsuuppat aammalu atuuffissaa ataaseq arlallilluunniit aalajangersimasut attuumassuteqartullu uppersarsarneqarsinnaasut, aammalu nioqqutissanut kiffartuussissutinullu taakkununga assersuunneqarsinnaaneranut sanilliussippat, ilanngullugu akia
- 4) allagarsiisup aamma unammillertaasup akornanni imaluunniit allagarsiisup aamma unammillertaasup nioqqutissanut nalunaaqutsiussaasa, suliffeqarfiisa aqqisa, allatigut ilisarnaataasa immikkuullarissut, nioqqutissaataasa kiffartuussissutaasalu akornanni paarlaassitsilissanngippat,
- 5) unammillertaasup nioqqutissanut nalunaaqutsiussaannik, suliffeqarfiata aqqanik, allatigut ilisarnaataannik immikkuullarissunik, nioqqutissaataannik, kiffartuussissutaannik, ingerlataannik allatigulluunniit pissutsisigut tatiginassusiiaassanngippat imaluunniit nakkarsaassanngippat.
- 6) unammillertaasup nioqqutissanut nalunaaqutsiussaanut, suliffeqarfiata aqqanut imaluunniit allatigut ilisarnaataannut immikkuullarissunut atatillugu isigineqarneranik ileqqorissaanngitsumik iluaquteqarniassanngippat aamma
- 7) nioqqutissamut nalunaaqutsiussamut imaluunniit suliffeqarfiup aqqanit illersorneqartumik issuaalluni nioqqutissamik sanaartussanngippat imaluunniit kiffartuussissumik pilersitsissanngippat imaluunniit nioqqutissamik imaluunniit kiffartuussissumik assiliissanngippat.

Pisisussanut aalajangersimasunut piumaffigineqarnani saaffiginnittarneq

§ 6. Inuussutissarsiummik ingerlataqartoq pineqartoq tamatuminnga sioqqutsisumik piunasaqarsimanngippat, nioqqutissanik, pigisanik aalaakkaasunik allanillu pisuussutininik pigisanik kiisalu sullississutininik kiffartuussissutinillu tuniniaanissaq siunertaralugu elektroniskimik allakkanik, nammineerluni sianertartunik imaluunniit telefax-imik atuilluni kikkunnnulluunniit saaffiginneqqusaanngilaq.

Imm. 2. Imm. 1 apeqqutaatinnagu inuussutissarsiummik ingerlataqartoq nioqqutissamik imaluunniit kiffartuussissumik tunisinermut atatillugu pisisartumit taassuma elektroniskimik tigussissumik tigusaqarsimasoq, nammineq nioqqutissaatiminik imaluunniit kiffartuussissutiminik assingusunik pisisartumut elektroniskimik allakkatigut tuniniaanissamik nittarsaassisinnaavoq. Tamatumunnga piunasaqaataavoq pisisartoq inuussutissarsiummik ingerlataqartumut najukkaminik tunniussinerminut atatillugu tamatumalu kingorna saaffiginninnermini pisariitsumik akeqanngitsumillu tamatuminnga saaffigineqannginnissaminik piunasaqarnissamut periarfissaqassasoq.

Imm. 3. Inuussutissarsiummik ingerlataqartoq, pineqartoq inuussutissarsiummik ingerlataqartumut taamaalioqqusinani piunasaqarsimappat, imm. 1-im taaneqartutut tuniniaanissamik siunertaqartumik ungasianiit attaveqaqatigiinnermut atortunik allanik atuilluni inummut aalajangersimasumut saaffiginneqqusaanngilaq.

Imm. 4. Inuk pineqartoq sioqqutsisumik inuussutissarsiummik ingerlataqartumit saaffigineqarnissamik piunasaqarsimappat imm. 3 atuutissanngilaq.

Imm. 5. Imm. 3-im taaneqartutut inuussutissarsiummik ingerlataqartoq siullermeertumik inummut aalajangersimasumut tamatuminnga peqqusisimanngitsumut saaffiginnikkuni, inuussutissarsiummik ingerlataqartup erseqqissumik paasinartumillu imm. 3-im taaneqartutut inuussutissarsiummik ingerlataqartumit saaffigeqqunnginnissamik pisinnaatitaaffeqarneq pillugu paasissutissiissaaq. Pineqartoq peqatigisaanik taamaattunik saaffigeqqunnginnermi pisariitsumik periarfissaqartinneqassaaq.

Imm. 6. Imm. 1 malillugu piunaffiginninnermik utertitsinissaq imaluunniit imm. 3-im taaneqartutut saaffigeqqunnginneq pillugu nalunaarutininik tigusinermut imaluunniit allattuinermut akiliisitsisoqarsinnaanngilaq.

Ilitsersuisarneq

§ 7. Neqerooruteqarnermi, isumaqatigiissuteqarnermi imaluunniit tunniussinerup nalaani pisut malillugit, pisuussutit nalillit imaluunniit sullississutip suussusaa malillugu tamanna pisuussutip imaluunniit sullississutip suussusaanik imaluunniit piginnaasaanik naliliinissamut pingaaruteqarpat, isumannaatsumik ilitsersuisoqassaaq, tassani ilaalluni pingaartumik atorneqarnerani piginnaasaqarnera, atasinnaassusaa, navianassusaa aamma aserfallatsaaliuinissamut periarfissat.

Imm. 2. Ilitsersuineq oqaatsit ilitsersuunneqartussamut paasinartut atorlugit ingerlanneqassaaq.

Kapitali 3

Oqaatsinik atuineq

§ 8. Allaganngorlugu ussassaarineq, allagartalersuineq aamma inini tamanit orninneqarsinnaasuni tuniniaanissamik nittarsaassineq sapinngisaq tamaat kalaallisut pissaaq. Tuniniaanissamik nittarsaassineq oqaatsit allat atorlugit pisinnaavoq.

Kapitali 4

Atuisunik illersuineq

Tuniniaanissamut nittarsaassinerit meeqqanut inuusuttunullu saaffiginnittut

§ 9. Inuussutissarsiummik ingerlataqartup tuniniaanissamik nittarsaassinera meeqqanut inuusuttunullu sammitinneqartoq, meeqqat inuusuttullu pissusissamisoortumik uppertikkuminarneri, misilittagaqannginneri isornartorsiuisinnaannginnerilu, sunneruminarnerannik piualersikkuminarnerannillu malitseqartartoq, eqqarsaatigalugu ilusilersorneqassaaq.

Imm. 2. Tuniniaanissamik nittarsaassineq meeqqanut inuusuttunullu sammitinneqartoq toqqaannartumik imaluunniit toqqaannanngitsumik nakuusernissamik allatulluunniit navianartumik soqqusaatsumillu pissusilersornissamik kaammattuissanngilaq imaluunniit pissusissaanngitsumik nakuusernissamik, ersiortitsinermik imaluunniit upperisapalaaqarnermik sunniiniutitut atuiffiussanani.

Imm. 3. Tuniniaanissamik nittarsaassineq meeqqanut inuusuttunullu sammitinneqartoq aanngajaarniutininik, ilanngullugu imigassanik aalakoorartortalinnik, eqqartuinernik, assilisanik imaluunniit innersuussutinik imaqartinneqassanngilaq.

Tuniniaanermik siuarsaasumik iliuuseqarnerit

§ 10. Tuniniaanermik siuarsaasunik iliuuseqarnerit nittarsaanneqassapput neqeroorummot tunngavissarititaasut ersarissunngorlugit aammalu atuisartunut pisisartunullu pissarsiariuminartunngorlugit aamma tapiliussatut sullississutit ilaatinneqarpata taakkua nalinga erseqqissumik paasissutissiisutigissallugit.

Imm. 2. Inuussutissarsiummik ingerlataqartoq nioqutissamik imaluunniit kiffartuussisummik aalajangersimasumik akeqartumik neqerooruteqaruni, aammalu inuussutissarsiummik ingerlataqartup taassuma amerlassusaani neqeroorummot taassumalu tuniniaanissamut nittarsaanneqarnerata annertussusaanut naleqqiullugu naleqquttumi piumanninnermik naammassinnissinnaassanani ilimagisaqarnissaminut naleqquttumik tunngavissaqaruni, inuussutissarsiummik ingerlataqartoq tamanna pillugu tuniniaanissamut nittarsaassinermini erseqqissumik tunuarsimaarfeqassaaq.

Allagartat aamma meqqit akikillisaataasut

§ 11. Meqqit, allagartat assigisaalluunniit atorlugit akikillisaasiinerit imaluunniit sullissinerit allat, atuinissamut piunasaqaatit atuisartunut paasiuminarpata, ersarippata pissarsiariuminarpataluunniit aatsaat atorneqaqqusaapput. Paasissutissat pingaaruteqartut, ilanngullugu tapiliussatut sullississutaasimasinnaasut nalingat pillugu paasissutissat, atuisartut aningaasaqarnikkut pissusilersornerannik malunnaatilimmik equtitsisinnaasut, ilaatinngitsoorneqassanngillat.

Makitsinerit aamma unammisitsinerit akissarsiassartaqartut

§ 12. Pisuussutini pigisanik kiffartuussissutini atuisartunut pisisartunullu tuniniaanerit makitsinermut, unammisitsinernut akissarsiassartaqartunut allatulluunniit iliuuseqarnernut peqataanermi iluanaaruteqarnissamik periarfissaqarnernik, inernerisassaannut peqataanissamut tamakkiisumik ilaannaasumilluunniit pisinissamik piumasaqaateqarfiusunik, siuarsarniarneqassanngillat.

Qularnaveequsiissutit

§ 13. Qularnaveeqqutini assigisaannilluunniit tunniussinissaq pillugu nalunaarut, aatsaat nalunaarummi tiguisusaaq inatsisit malillugit pisinnaatitaaffinit pitsaanerusumik pisinnaatitaaffilerneqassappat atorineqassaaq.

Imm. 2. Qularnaveeqqummik tunniussisoqarpat, inuussutissarsiummik ingerlataqartoq erseqqissumik paatsuugassaanngitsumillu taassuma imarisaa pillugu paasissutissiissaaq aammalu paasissutissat qularnaveeqqummik atuinissamut pisariaqartut tunniutissallugit.

Imm. 3. Qularnaveeqqummik tunniussisoqarpat inuussutissarsiummik ingerlataqartup erseqqissumik paatsuugassaanngitsumillu ilisimatitsissutigissavaa, atuisartup pisisartullu inatsisit malillugit pisinnaatitaaffi saneqqunneqarsinnaanngitsut qularnaveeqqummit kalluarneqanngitsut.

Imm. 4. Inuussutissarsiummik ingerlataqartoq atuisartumit pisisartumillu qinnuigineqaruni qularnaveeqqut allaganngorlugu tunniutissavaa. Allaganngorlugu qularnaveeqqutit kalaallisut, danskisut imaluunniit tuluttut oqaasertalerneqarsinnaapput. Atuisartup pisisartullu oqaatsit pingasut taakkua arlaat atorlugit qularnaveeqqutit tunniunneqarnissaa kissaatiginerlugu toqqassavaa.

Pisinissamik kaammattuinerit

§ 14. Atuisartumut pisisartumullu saaffiginnittumik pisinissamik kaammattuineri, tak. imm. 33, inuussutissarsiummik ingerlataqartup paasissutissat makkua tunniutissavai:

- 1) nioqqutissap imaluunniit kiffartuussissutit ilisarnaatai pingaaruteqartut,
- 2) inuussutissarsiummik ingerlataqartup najugaa atialu,
- 3) pissutsit akiliinissamut, tunniussinissamut aamma isumaqatigiisummik piviusunngortitsinissamut tunngasut, pissutsit taakkua suliaasaqarfimmi ileqqusartumit allaanerusimappata,
- 4) peqqissimisinnaatitaaneq, taamaatitsisinnaatitaaneq imaluunniit utertitsisinnaatitaaneq, atuisartooq pisisartorlu taamaattumik pisinnaatitaaffeqarsimappat, kiisalu
- 5) akia, ilanngullugit akitsuutit.

Imm. 2. Nioqqutissaq imaluunniit kiffartuussissutit sioqqutsisumik naleqquttumik akia naatsorsorneqarsinnaanngitsoq pineqarpat, akiusoq qanoq naatsorsorneqarnerisooq allanneqassaaq. Naleqqutsillugu aningaasartuutit allat tamarmik assartuinerimut, tunniussinermut imaluunniit nassiussinermut akiusumut tunngasut allanneqassapput, imaluunniit aningaasartuutit taakkua naleqquttumik sioqqutsisumik naatsorsorneqarsinnaanngippata, aningaasartuutit taakkua ilaatinneqarsinnaasut paasissutissiissutigineqassalluni.

Imm. 3. Pisinissamik kaammattuinerit paasineqassaaq attaveqaqatigiinneq niuernerimik tunngaveqartoq, tassani tunisassiap suussusaa akialu niuernerimik tunngaveqartumik attaveqaqatigiinnerimut atorineqartumut naleqquttumik allanneqassallutik, taamaaliornikkullu atuisartunut pisisartunullu pisinnaalersitsisoqassalluni.

Aaqqissuussaasumik akikillisaasiisarneq

§ 15. Inuussutissarsiummik ingerlataqartup erseqqissumik aammalu pisiniarfimmi ersiinnartumik paasissutissiissutigippagu, peqatigiiffiit, inuit aalajangersimasut imaluunniit kattuffiit sorliit akikillisaavigineqarnersut, aaqqissuussaasumik akikillisaasiisarneq akuerisaavoq.

Imm. 2. Inuussutissarsiummik ingerlataqartoq piumaffigineqarnermini nioqqutissanut kiffartuussissutinullu aaqqissuussaasumik akikillisaasiinermi pineqartunut ilaasunut kiisalu taakkua annertussusaannut allattuiffimmik takutitsisinnaassaaq.

Imm. 3. Ungasianiit tuniniaanermi imm. 1-imi taaneqartut paasissutissat akiusunik paasissutissiinermut atatillugu tunniunneqassapput. Paasissutissat imm. 2-imi taaneqartut pisisartup tamanna piumasarippagu tunniunneqassapput.

Allagartalersuineq poortuusersuinerlu

§ 16. Nioqqutissaq taassumaluunniit poortorneqarnera erseqqinnerusumik ilitersuussinikkut nioqqutissat amerlassusaat, imarisai katitigaaneralu, atasinnaassusaa aammalu allatigut qanoq suliarineqarsimanera pillugu paasissutissartaqarpas aatsaat, nioqqutissat aalajangersimasut Kalaallit Nunaanni niuerfimmi tunineqarsinnaasut imaluunniit tuniniarneqarlutik neqeroorutigineqarsinnaasut pillugu aalajangersakkanik Naalakkersuisut aalajangersaasinnaapput.

Imm. 2. Nioqqutissat Naalakkersuisunit akuerineqartunik immikkut poortuusersuuteqartut kisimik Kalaallit Nunaanni niuerfimmi tunineqarsinnaasut imaluunniit tuniniarneqarlutik neqeroorutigineqarsinnaasut pillugu aalajangersakkanik Naalakkersuisut aalajangersaasinnaapput.

Akiusut paasissutissiissutigineqartarneri

§ 17. Inuussutissarsiutitut nioqqutissanik atuisartunut tuniniaanermi nalunaaqutsersuinerni, allagartalersuisarnerni imaluunniit allatut iliorluni ersarissumik ilisimatitsissutigineqartassaaq nioqqutissamut neqeroorutigineqartumut imaluunniit nioqqutissaqatigiinnut ataatsimut akiusoq, akitsuutit ilanngutereerlugit, aningaasartuutit aamma akileraarutit. Nioqqutissanik elektroniskiusumik atuisartunit allatsinneqarsinnaasunik neqerooruteqarnerni, assigisaanik oqaaseqatigiit siulliit atuutissapput.

Imm. 2. Inuutissarsiutitut tuniniakkanik aningaalersuinerunngitsumik aalajangersimasumiit pisiniarfimmiit atuisunut kiffartuussinerit, kiisalu kiffartuussineq elektronikkikkut atuisartunut tuniniarneqarpas imissutiginiissaanut periarfissaqarluni imm. 1, 1. Oqaaseqatigiinni siulleg, assiganik atorineqassaaq siumut katillugu akimik aalajangiisoqarsimappat tassunga pineqartumut kiffartuussinermut. Tamakkiisumik akimik aalajangiinissaq periarfissaanngippat tuniniakkat kiffartuussinerit annertussuseqarnerat pissutaalluni, taamaasilluni akia aalajangiunneqassaaq naleqquttumik toqqarluakkatullu.

Imm. 3. Siumoortumik kiffartuussinermut aalajangersimasumik akiusussamik aalajangersaaffioreersimanngitsuni inuussutissarsiummik ingerlatsisup atuisartup piumasaqarneratigut isumaqatigiissuteqannginnermi ilimatitsissutigissavai:

- 1) kiffartuussinermut pineqartumut akiususaaq ataatsimoortoq,
 - 2) akimik naatsorsuussinermut periuseq, akia eqqorlugu oqaatigineqarsinnaanngippat, taamaasillunilu akia atuisartumiit misileqqinneqarsinnaalluni, imaluunniit
 - 3) missingersuusaaq naammattunik immikkuualuttortalikkamik suliaasoq.
- Imm. 4.* Atuisartooq imm. 3 malillugu allaganngorlugu piumasaqarluni saqqummiippat, inuussutissarsiortoq allaganngorlugu paasissutissanik tunniussissaaq, atuisartooq ersarissumik allatut piumasaqarsimanngippat.
- Imm. 5.* Aningaasarsiornermut tunngasuunngitsumik kiffartuussineq akiligassiissuteqarluni suliarineqareerpat, atuisartooq akiligassiissummik immikkuualuttortalersukkamik tigusaqassaaq, periarfissaqartitsisussamik taassuma nioqqutip kiffartuussinermi tunniunneqartup akianik nakkutiginnissinnaanissaanik. Atuisartooq paasissutissineqassaaq nal. akunneranut akigitinneqartumik, akunnernik atorineqartunik aamma atortulersuutinik qanoq ittunik kiffartuussinerup akianut sunniuteqartunik atuisoqarsimaneranik.
- Imm. 6.* Inuussutissarsiortup tamakkiisumik imaluunniit ilaannakuusumik paasissutissat imm. 5-imi eqqaaneqartut taarsersinnaavai paasissutissanik allanik, tamanna pippat atuisumut isumaqatigiissuteqarnikkut, imaluunniit suliassaqaarfimmi ingerlatsiviusumi tassani ileqquusut tamanna kingunerippassuk.
- Imm. 7.* Inuussutissarsiortoq atuisartup piumasaqarneratigut ilassutitut paasissutissiissaaq, atuisartumik periarfissaqartitsilertussamik nioqqutit tunineqartut akiinik nakkutilliilluni paasiniaasinnaanernik. Qinnutiginninneq piffissap naammaginatup iluani saqqummiunneqassaaq.
- Imm. 8.* Ussassaarisarnermi taaguutit, assersuutigalugu "Neqeroorutit", "Ussassaarinermi akigititaq" imaluunniit "Akikilliliineq", taamaallaat atorineqarsinnaapput eqqortumik atorineqarlutik piviusunik imaqaarunik. Ussassaaraluni oqariaaseq atorineqartoq akiusunik appaasoqarneranik paasineqarsinnaappat, taava ussassaarineq sioqqullugu akiusimasooq imaluunniit akimik appaanerup annertussusia ussassaarummi imaluunniit allagartaliussami nalunaarneqassapput.
- Imm. 9.* Naalakkersuisut maleriagassiorsinnaapput makkununga:
- 1) immikkut ittumik maleruagassanik imm. 1-7-imi sanioqqutsisinnaanernut, tamatumani aamma akiligassarsinermut atatillugu atugassarititaasunut paasissutissanik,
 - 2) akiusunut tunngasunik paasissutissiisarnermut periaasissanik, aamma paasissutissat tunniunneqartut annertussusissaannut, aamma
 - 3) imm. 1-imisulli periaaseqarluni paasissutissiisoqartassasooq nioqqutip akianik aamma nioqqutip uuttuutini aalajangersimasuni akianik, aammalu uuttuutit nioqqutissaqatigiinnut ataasiakkaanut atorineqartussat pillugit.

Akiliutit

§ 18. Akiliut paasineqassaaq tassaasooq immikkut kiffartuussinermut, atuuffimmut imaluunniit sullissinermut, nioqqutissamik imaluunniit kiffartuussisummik pisinermut atasoq.

Imm. 2. Akiliutit pisineq sioqqullugu erseqqissumik ilisimatitsissutigineqassapput.

Imm. 3. Annertussusissaaq imaluunniit akiligassiissutissaaq akitsuut isumaqatigiissutaasumik atsiukkami ingerlaavartumi taamaallaat atuisartumut nammatassatut allannngortinneqarsinnaavoq tamatumunnga tunngaviusut atugassarititaasut isumaqatigiissummi atsiukkami erseqqissarneqarsimappata. Tamannali atuutinngilaq akitsuutitut inatsisitigut aaqqissuussaasunut.

Imm. 4. Allanguineq akitsuummik imaluunniit akiligassiisummik atsiukkatut isumaqatigiissutaasumi ingerlasumi, siumoortumik ilisimatitsissutigineqarsimassaaq naapertuuttumik piffissaliilluni, atuisartumut atortuulinnginnerminni.

Imm. 5. Akitsuummik allanguineq annertuppat, imaluunniit akitsuummik allamik nutaamik akiligassiisuteqartoqarpat, siumoortumik atuisartumut ilisimatitsisoqassaaq atuisartut ataasiakkaarlugit allakkatigut attaveqarfiginerisigut, allanguutip atortuulinnginnerani. Atuisartuq isumaqatigiissummik atorunnaarsitsisinnaanermut pisinnaatitaappat, tamanna siumoortumik atuisartumut ilisimatitsissummi ersissaaq, soorluttaaq aamma ersissaaq atugassarititaasut qanoq ittut iluanni atuisartup isumaqatigiissut atorunnaarsissinnaaneraa.

Akiitsorluni pisisarneq

§ 19. Nioqqutissat atuisartunut pisisartunullu pisinermut akiusoq akilersuinikkut akilernerqarsinnaasooq paasissutissartaqartumik inuussutissarsiutigalugu neqeroorutigineqarpata, § 17-imi allassimasutut taassumatuut pisiarinerani akiusoq, ataatsimut katillugu akiusoq, ilanngullugit erniat aningaasartaat, akitsuutit aammalu tapiliussat allat, siulequtsiussatut akiliutissaaq kiisalu akilersuinerit ataasiakkaat annertussusissaat, amerlassusissaat piffissarlu akilernerqarfissaat pillugit paasissutissanik tunniussisoqassaaq.

Imm. 2. Nioqqutissat pisisartunut elektroniskimik neqeroorutigineqarpata inniminniinissaaq periarfissaqarluni, imm. 1-imi ilisimatitsinissamut pisussaaffusoq taamaaqataanik atuutissaaq.

§ 20. § 17 akitsorterussilluni tuniniaanermi aamma qanganitsatut ilusilinnik eqqumiitsulianillu tuniniaanermut atuutinngilaq.

Imm. 2. Atornikunik tuniniaaneq § 17-imi pineqartunut ilaanngitsoq Naalakkersuisut aalajangersakkanik aalajangersaasinnaapput.

§ 21. Ussasaarinikkut imaluunniit aningaasarsiornermut tunngasuunngitsumik kiffartuussineq pillugu allatut nioqqutip akianik atuisartunut ilisimatitsisoqarpat, paasissutissat pineqartut piumasaqaatinik § 17, imm. 1 imaluunniit imm. 3, nr. 1-3, § 17, imm. 8, § 19 kiisalu aamma aalajangersakkanik § 16, imm. 1, aamma § 17, imm. 9 -mik naammassinnittuussapput.

Kapitali 5

Inuussutissarsiummik ingerlataqartunut tunngatillugu maleruagassat

Niuertarfiup ilisarnaataa

§ 22. Inuussutissarsiummik ingerlataqartut niuertarfimmut ilisarnaatinik assigisaannilluunniit piginggisaminnik atueqqusaangillat, imaluunniit nammineq ilisarnaatiminnik allanut paarlaanneqarsinnaasunik atueqqusaanatik.

Inuussutissarsiornermi isertugaatit aamma titartakkat tekniskiusut

§ 23. Atorfeqartoq imaluunniit suliffeqarfimmut suleqateqartoq imaluunniit tassunga sullissilluni suliaqartoq, pissusissaanngitsumik suliffeqarfiup inuussutissarsiornermi isertugaataannik ilisimasaqalerniarluni pissarsissaanngilaq imaluunniit pissarsiniarsarissanani imaluunniit atuissanani.

Imm. 2. Pineqartoq suliffeqarfiup inuussutissarsiornermi isertugaataannik unioqqutitsinngitsumik ilisimasaqalersimaguni imaluunniit atugassaqaruni, piginnaatinneqarsimanngikkuni isertugaatinik taamaattunik ingerlatitseqqeqqusaanngilaq imaluunniit atueqqusaanani. Inerteqquteqarneq atorfeqarnerup, suleqateqarnerup suliaqarnerulluunniit unereernerata kingorna ukiuni pingasuni atuutiinnassaaq.

Imm. 3. Imm. 1-imi aamma 2-imi maleruagassat taamatuttaaq inunnut allanut suliffeqarfimmut inatsisit malillugit isersinnaasunut atuutissapput.

Imm. 4. Suliassamik suliaqarnermut atatillugu imaluunniit inuussutissarsiorneq siunertaralugu titartakkanik tekniskiusunik, nassuiaatinik, malitassanik, ilusilianik assigisaannilluunniit paasitinneqarsimasoq, najoqqutassanik taamaattunik piginnaatinneqarani atueqqusaanngilaq imaluunniit allanik taamaaliorsinnaalersitseqqusaanani.

Imm. 5. Inuussutissarsiummik ingerlataqartoq inuussutissarsiornermi isertugaatinik ilisimasaqarneq imaluunniit atugassinneqarneq aalajangersakkanik matuma siuliani taaneqartunik unioqqutitsinikkut anguneqarsimappat, taakkuninnga atueqqusaanngilaq.

Kapitali 6

Nakkutilliinermut aalajangersakkat

§ 24. Imm. 2-mi aamma 3-mi ilaatinneqartussaannngitsutut taaneqartut atuutsillugit Atuisartoqarnermut Unammilleqatigiinnermullu Aqutsisoqarfik Inatsisartut Inatsisaanni matumani aalajangersagaasunik unioqqutitsisoqannginnissaanik nakkutilliisussaavoq. Atuisartoqarnermut Unammilleqatigiinnermullu Aqutsisoqarfik nakkutilliinermik suliaqarnermini arlaannaanulluunniit atasuussanngilaq.

Imm. 2. Naalakkersuisut imaluunniit tamatumunnga piginnaatinneqartoq nakkutilliisussaavoq aalajangersakkat § 16, imm. 2 naapertorlugu suliaasut unioqqutinneqannginnissaannik.

Imm. 3. Naalakkersuisut imaluunniit taanna Naalakkersuisut Uumasut Nakorsaqaarfik Oqartussaaffittut toqqarsimasaata nakkutigissavaa inatsisinik § 16, imm. 1. naapertorlugu inerteqqutigineqartunik unioqqutitsisoqannginnissaa.

Imm. 4. Atuisartoqarnermut Unammilleqatigiinnermullu Aqutsisoqarfiup piumasarisinnaavaa paasissutissat pisariallit Inatsisartut Inatsisaanik unioqqutitsisoqarsimanersoq aalajangiunniarlugu tunniussisoqarnissaa, aammalu iluameersumik kinaassutsimik uppersaammik takutitsinikkut killilersugaanngitsumik aammalu akornuserneqanngitsumik pisiniarfiup ammanerani pisiniartut pisiniartarfiannut isersinnaassalluni.

Imm. 5. Naalakkersuisut imaluunniit taanna Naalakkersuisut Uumasut Nakorsaqaarfik Oqartussaaffittut toqqarsimasaata piumasarisinnaavaa paasissutissat pisariallit inatsisinik § 16, imm. 1. naapertorlugu inerteqqutigineqartunik unioqqutitsisoqarsimanersoq aalajangiunniarlugu tunniussisoqarnissaa, aammalu iluameersumik kinaassutsimik uppersaammik takutitsinikkut killilersugaanngitsumik aammalu akornuserneqanngitsumik pisiniarfiup ammanerani pisiniartut pisiniartarfiannut isersinnaassalluni.

§ 25. Atuisartoqarnermut Unammilleqatigiinnermullu aqutsisoqarfik isumaqarpat Inatsisartut inatsisaanni aalajangersakkanut, Atuisartoqarnermut Unammilleqatigiinnermullu aqutsisoqarfimmit nakkutigineqartunut akerliu sumik iliuuseqartoqarsimasoq, Atuisartoqarnermut Unammilleqatigiinnermullu aqutsisoqarfiup suliassaq eqqartuussivimmut aalajangiiffigisassanngorlugu suliakkiissutigisinnaavaa. Atuisartoqarnermut Unammilleqatigiinnermullu aqutsisoqarfik isumaqarpat, aalajangersakkat pineqaatissiiviusinnaasut Atuisartoqarnermut Unammilleqatigiinnermullu aqutsisoqarfimmit nakkutigineqartut unioqqutinneqarsimasut, Atuisartoqarnermut Unammilleqatigiinnermullu aqutsisoqarfiup politimesteri unnerluussuteqaqqullugu qinnuigisinnaavaa. Tamanna aamma atuuppoq eqqartuussivimmit inerteqquteqarneq unioqqutinneqarsimappat.

Imm. 2. Naalakkersuisut imaluunniit uumasut nakorsaqaqarnermut oqartussaasoq Naalakkersuisunit toqqarneqarsimasoq isumaqarpat aalajangersakkanut § 16, imm. 1 naapertorlugu aalajangersarneqarsimasunut akerliu sumik iliuuseqartoqarsimasoq, Naalakkersuisut imaluunniit uumasut nakorsaqaqarnermut oqartussaasup Naalakkersuisunit toqqarneqarsimasup suliassaq eqqartuussivimmut aalajangiiffigisassanngorlugu suliakkiissutigisinnaavaa. Naalakkersuisut imaluunniit uumasut nakorsaqaqarnermut oqartussaasoq Naalakkersuisunit toqqarneqarsimasoq isumaqaruni § 16, imm. 1, imaluunniit aalajangersakkat § 16, imm. 1 naapertorlugu aalajangersarneqartut uumasunut nakorsaqaqarnermut oqartussaasut nakkutilliivigisai unioqqutinneqarsimasut, uumasunut nakorsaqaqarnermut oqartussaasup politimesteri unnerluussuteqaqqullugu qinnuigisinnaavaa. Tamanna aamma atuuppoq eqqartuussivimmit inerteqquteqarneq unioqqutinneqarsimappat.

Kapitali 7

Sioqqutsisumik nalunaaruteqartarneq

§ 26. Atuisartoqarnermut Unammilleqatigiinnermullu aqutsisoqarfik isummernissaq immikkut nalornissuteqalersitsissanngippat imaluunniit allatigut immikkut pisunik pisoqanngippat, piumaffigineqarnermigut tuniniaanissamik nittarsaassinermit iliuuserisassatut eqqarsaatigineqartut inatsisinik malinniffunerannut isiginninnini pillugu oqaaseqaateqartassaaq. Sioqqutsisumik nalunaaruteqarnermi iliuusissap pineqartup inatsisinut naapertuunneranut isummertoqavinngilaq.

Imm. 2. Atuisartoqarnermut Unammilleqatigiinnermullu Aqutsisoqarfik inuussutissarsiummik ingerlataqartumut sioqqutsisumik nalunaaruteqarpat, iliuuseqarnissaq eqqarsaatigineqartoq Atuisartoqarnermut Unammilleqatigiinnermullu Aqutsisoqarfiup paasinninnera malillugu inatsisinut naapertuuttoq, Atuisartoqarnermut Unammilleqatigiinnermullu aqutsisoqarfik iliuuseqarnermut sioqqutsisumik nalunaaruteqarfigineqartumut aammalu taassuma nalunaarutigineqareernerani piffissap naleqquttup iluani aallartinneqartumut, nammineerluni iliuuseqarnermigut inuussutissarsiummik ingerlataqartumut akuliussinnaanngilaq.

Imm. 3. Naalakkersuisut sioqqutsisumik nalunaaruteqarnermut akiliut pillugu maleruagassanik aalajangersaasinnaapput.

Imm. 4. Naalakkersuisut sioqqutsisumik nalunaaruteqarnermi suliassanik suliarinnittarnermut maleruagassanik aalajangersaasinnaapput.

Kapitali 8

Inuussutissarsiummik ingerlataqartut atuisunit naammagittaalliuutigineqarnerannik suliaqartarneq

§ 27. Nioqqutissat, sullissinerit kiffartuussinerillu pillugit atuisunit naammagittaalliuutit Atuisartut Pisisartullu Maalaarutaannik Aalajangiisartunut suliaassanngortinneqarsinnaapput.

§ 28. Atuisartut Pisisartullu Maalaarutaannik Aalajangiisartut naammagittaalliuutit inatsisini allani immikkut naammagittaalliuuteqartarnermut maleruagassanik imaluunniit naammagittaalliorfimmik aalajangersaaffiusimasut suliarisinnaanngilai.

§ 29. Illuatungaannarsiortumik imaluunniit isumaqatigiissuteqarnikkut aalajangerneqarsinnaanngilaq, naammagittaalliuutaasoq Atuisartut Pisisartullu Maalaarutaannik Aalajangiisartunut suliaassanngortinneqarsinnaanngitsaq, takuuk § 27.

Imm. 2. Atuisartut Pisisartullu Maalaarutaannik Aalajangiisartut naammagittaalliuutaasoq, Atuisartut Pisisartullu Maalaarutaannik Aalajangiisartuni suliarineqarnissamut naleqqutinnngitsutut nalilerneqartoq, suliariumanngissinnaavaa.

Imm. 3. Naammagittaalliornermi atuisoq taparserneqarsinnaanngitsaq ersarilluinnarpat, Atuisartut Pisisartullu Maalaarutaannik Aalajangiisartut naammagittaalliuutaasoq suliariumanngissinnaavaa.

§ 30. Inuussutissarsiummik ingerlataqartut atuisunit naammagittaalliuutigineqarnerannut Atuisartut Pisisartullu Maalaarutaannik Aalajangiisartuni aalajangiiffigineqassapput.

Imm. 2. Atuisartut Pisisartullu Maalaarutaannik Aalajangiisartut 3-inik ilaasorta qarput, imatut toqqarneqartartunik:

1) Ilaasorta q ataaseq atuisartunut kattuffinnit ataatsimoorlutik inassuteqaateqarsinnaatitaasunit, Unammilleqatigiinnermi Aalajangiisartunut ilaasortassamik inassuteqaateqartartunit, toqqarneqassaaq.

2) Ilaasorta q ataaseq inuussutissarsiornermi kattuffinnit ataatsimoorlutik inassuteqaateqarsinnaatitaasunit Unammilleqatigiinnermi Aalajangiisartunut ilaasortassamik inassuteqaateqartartunit, toqqarneqassaaq.

3) Ilaasorta q ataaseq Atuisartoqarnermut Unammilleqatigiinnermullu Aqutsisoqarfimmi Aqutsisoqarfimmi pisortaasusaaq imaluunniit tullersortaassalluni taassuminnga toqqarneqartoq. Atuisartoqarnermut Unammilleqatigiinnermullu Aqutsisoqarfimmit ilaasorta q Atuisartut Pisisartullu Maalaarutaannik Aalajangiisartuni siulitaasuusaaq.

Imm. 3. Ilaasortat piffissamut ukiunik sisamanik sivisussuseqartumut toqqarneqassapput.

Imm. 4. Atuisartut Pisisartullu Maalaarutaannik Aalajangiisartut suliaassanik ataasiakkaanik aalajangiineri ataatsimiinnermi imaluunniit ilaasortanut aalajangiiffigisassanik allakkatigut taasinikkut aalajangiiffigisassatut saqqummiussilluni nassiussinermi pisassapput. Atuisartut Pisisartullu Maalaarutaannik Aalajangiisartut ukiumut minnerpaamik ataasiarlunik naapillutik ataatsimiissapput.

Imm. 5. Atuisartut Pisisartullu Maalaarutaannik Aalajangiisartut suleriaasissartik namminneerlutik aalajangersassavaat.

Imm. 6. Atuisartut Pisisartullu Maalaarutaannik Aalajangiisartut allattoqarfeqarnerat Atuisartoqarnermut Unammilleqatigiinnermullu Aqutsisoqarfimmit isumagineqassaaq.

§ 31. Naammagittaalliuutaasoq eqqartuussivinni imaluunniit isumaqatigiissitsiniarnikkut aalajangiisartunit aalajangiiffusoq, Atuisartut Pisisartullu Maalaarutaannik Aalajangiisartunut

suliassanngortinneqarsinnaanngilaq.

§ 32. Inuussutissarsiummik ingerlataqartup aalajangiinnermut Atuisartut Pisisartullu Maalaarutaannik Aalajangiisartunitaalajangiunneqarsimasumut pituttorsimanissaq kissaatiginngikkuniuk, inuussutissarsiummik ingerlataqartup tamanna allakkatigut Atuisartoqarnermut Unammilleqatigiinnermullu Aqutsisoqarfimmut aalajangiinerup nalunaarutigineqarneranit ullut 30-t qaangiutsinnagit nalunaarutigissavaa.

§ 33. Naammagittaalliornermut suliamik aallartitseqqinnissaq pillugu inuussutissarsiummik ingerlataqartumit piumasaqaat, § 32-imi piffissaliussaq nallertinnagu allaganngorlugu Atuisartoqarnermut Unammilleqatigiinnermullu Aqutsisoqarfimmut tunniunneqarsimasoq, kinguartitsinissamik sunniuteqassaaq. Tamatuma kingorna § 32-imi piffissaliussaq piffissamit Atuisartut Pisisartullu Maalaarutaannik Aalajangiisartut aallartitseqqinnissamik suliami aalajangeereerneranit naatsorsorneqassaaq.

§ 34. Atuisartut Pisisartullu Maalaarutaannik Aalajangiisartut naammagittaalliummut suliani aalajangiineri §§ 32-imi aamma 33-imi piffissaliussat qaangiutereerneranni inuussutissarsiummik ingerlataqartumut tunngatillugu pinngitsaaliissumik naammassineqarsinnaapput.

Imm. 2. Pinngitsaaliissumik naammassinninnissaq pillugu eqqartuussivinnut piumasaqaateqarnermut Atuisartut Pisisartullu Maalaarutaannik Aalajangiisartut aalajangiinerat pinngitsaaliissumik naammassinninnissamik piumasaqarnermut tunngavissaliisoq aammalu pineqartoq aalajangiinnermut pituttorsimanissamik kissaateqanngitsoq §§ 32-imi aamma 33-imi piffissaliussat sioqqullugit inuussutissarsiummik ingerlataqartoq nalunaaruteqarsimanngitsoq Atuisartoqarnermut Unammilleqatigiinnermullu Aqutsisoqarfimmit uppersaasat ilanngunneqassapput.

§ 35. Naammagittaalliuteqarnermut suliami aalajangiisoqareerpat illuatungeriit tamarmik immikkut suliaq eqqartuussivinnut suliassanngortissinnaavaat. Aalajangiinerit malinneqanngippata Atuisartut Pisisartullu Maalaarutaannik Aalajangiisartut atuisup piumasaqarneratigut suliassaq atuisoq sinnerlugu eqqartuussivinnut suliassanngortissinnaavaa.

Imm. 2. Atuisartut Pisisartullu Maalaarutaannik Aalajangiisartut aalajangiineri allaffissornikkut oqartussaasumut allamut suliassanngortinneqarsinnaanngillat.

Kapitali 9

Paasissutissat aamma tamanut ammasumik saqqummiussisarneq

§ 36. Atuisartoqarnermut Unammilleqatigiinnermullu Aqutsisoqarfimmit aamma Atuisartut Pisisartullu Maalaarutaannik Aalajangiisartunit aalajangiinerit tamanit soqutiginaateqartut tamanut ammasumik saqqummiunneqarsinnaapput.

Imm. 2. Tamanut ammasumik saqqummiussineq kinaassuseq ersigunnaartillugu pissaaq.

§ 37. Atuisartoqarnermut Unammilleqatigiinnermullu Aqutsisoqarfik inuussutissarsiummik ingerlataqartunut Atuisartut Pisisartullu Maalaarutaannik Aalajangiisartut aalajangiinerinik

malinninngitsunut allattuiffimmik tamanut ammasumik saqqummersitsisinnaavoq.

Imm. 2. Imm. 1 malillugu tamanut ammasumik saqqummersitsineq pisinnaavoq

1) ullunik 30-nik piffissaliussap § 32-mi aalajangersarneqartup iluani aalajangiineq malinneqarsimanngippat, aamma

2) Atuisartoqarnermut Unammilleqatigiinnermullu Aqutsisoqarfiup nr. 1-imi piffissaliussap taaneqartup naareernerani inuussutissarsiummik ingerlataqartoq allakkatigut nalunaarfigisimanngippagu paasissutissanik tunniussinnermit ullunik 14-inik piffissaliussinerup iluani aalajangiineq malinneqanngippat malinnissimannginnerup imm. 1 malillugu tamanut ammasumik saqqummiunneqarneranik malitseqarsinnaasoq.

Imm. 3. Aalajangiineq eqqartuussivimmut suliassanngortinneqarsimappat, eqqartuussivimmit inaarutaasumik aalajangiineq pereersimatinnagu, imm. 1 malillugu tamanut ammasumik saqqummiussineq pisinnaanngilaq.

Imm. 4. Inuussutissarsiummik ingerlataqartup aqqanik tamanut ammasumik saqqummiussinissaq, inuussutissarsiummik ingerlataqartup piumasaqarneratigut kinguartinneqassaaq, aalajangiinerup malinneqarnissaanut apeqqummut assingusumut eqqartuussiviup aalajangiinissaa, aalajangiinerup pineqartumut pingaaruteqarsinnaasoq, utaqqineqarpat. Taamaattoqarsimappat tamanut ammasumik saqqummiussineq aatsaat eqqartuussiviup aalajangiinerata kingorna ullut 30-t qaangiunneranni pisinnaavoq.

Imm. 5. Inuussutissarsiummik ingerlataqartup aqqanik tamanut ammasumik saqqummiussineq pisimappat, aammalu tamatuma kingorna aalajangiineq malinneqarpat, inuussutissarsiummik ingerlataqartoq pillugu paasissutissat allattuiffimmit peerneqassapput.

Imm. 6. Inuussutissarsiuteqartup aqqanik tamanut ammasumik saqqummiussineq sivisunerpaamik ukiumik ataatsimik sivilussuseqassaaq.

Kapitali 10

Inerteqqutit aamma pineqaatissiissutit

§ 38. Iliuseqarnerit Inatsisartut inatsisaanni matumani aalajangersakkanut imaluunniit aalajangersakkanut Inatsisartut inatsisaanni tunngaveqartumik aalajangersagaasunut unioqqutitsisut eqqartuussiviup eqqartuussinikkut inerteqqutigisinnaavai.

Imm. 2. Imm. 1 malillugu suliassat siullertut suliarinnittussat Kalaallit Nunaanni eqqartuussivinni suliakkiissutigineqartassapput.

§ 39. Pineqaatissiissutit akiliisitaasussanngortitaanerit pisinnaapput, makkuninnga:

1) Unioqqutitsinerni § 3, imm. 1-2, § 4, § 6, imm. 1, 3 aamma 6, § 9, imm. 2-3, § 11, § 12, § 18, imm. 5, aamma § 23-mik.

2) Piaaraluni § 22-mik unioqqutitsinermi.

3) Ussassaarutini assingusunik atuinermi, tak. § 5, imm. 1, eqqortinnagit aalajangersakkat § 5, imm. 2-miittut.

4) § 10-mut akерliusumik ussassaarinermik ingerlatsinikkut.

5) § 14, imm. 1 aamma 2-mut akерliusumik atuisartunut pisinissamik kaammattuinnikkut.

6) Peqqussutaasunik § 15, imm. 2 aamma 3, § 17, imm. 1-2, 5 aamma 7-8, § 19 imaluunniit § 21 -imiittunik

ilisimatitsissuteqannginnikkut.

7) Paasissutissanik ilisimatitsinnginnikkut imaluunniit isersinnaatitsinikkut § 24, imm. 4-5 naapertorlugit, imaluunniit pissutsini Inatsisartut Inatsisaannut ilaasuni pisortani oqartussanut eqqunngitsunik imaluunniit salloqittaalluni nalunaaruteqarnikkut.

8) § 38 naapertorlugu eqqartuussivimmit inerteqqutaasunik ilaginnaanikkut.

Imm. 2. Najoqqutassanut Inatsisartut inatsisaat manna naapertorlugu atuutsinneqalersimasunut, Kalaallit Nunaanni pinerluttulerinermut inatsimmi maleruagassat malillugit akileeqqusissutitut iluseqartunik iliuusissanik aalajangersaasoqarsinnaavoq.

Imm. 3. Akileeqqusissummik aalajangersaaneq Inatsisartut inatsisaanni imaluunniit najoqqutassani Inatsisartut inatsisaat naapertorlugu atuutsinneqalersimasuni inatsisitigut tunngaveqarpat, akileeqqusissut Kalaallit Nunaanni pinerluttulerinermut inatsimmi maleruagassat malillugit pisinnaatitaasunut pisussaataasunullu peqqusissutigineqarsinnaavoq.

Imm. 4. Akileeqqusissutit Inatsisartut inatsisaat manna malillugu imaluunniit najoqqutassat Inatsisartut inatsisaat naapertorlugu aalajangersarneqartut malillugit pineqaatissiissutigineqartut Nunap karsianut tutsinneqassapput.

Kapitali 11

Atuutilersitsineq

§ 40. Inatsisartut inatsisaat ulloq 1. juli 2015 atuutilerpoq.

Imm. 2. Peqatigisaanik atuisartunut pisisartunullu siunnersuisartoqatigiit, tuniniaasarneq, nalunaaqutstersuisarneq, akit aamma atuisartunut pisisartunullu maalaaruteqartarfittut ataatsimiititaliat pillugit Inatsisartut inatsisaat nr. 10, 13. november 1986-imeersoq atorunnaarsinneqarpoq.

Imm. 3. Maleruagassat Inatsisartut inatsisaat imm. 2-mi taaneqartoq malillugu atuutilersinneqartut, inatsisartut inatsisaat manna imaluunniit allat naapertorlugit taarserneqarnissamik imaluunniit atorunnaarsinneqarnissamik tungaanut atuutiinnassapput.

Inatsisartut inatsisaat nr. 7, 19. november 2020 (Nioqqutissat akiinut paasissutissat, akinut aamma fakturamut tunngasunik paasissutissat, pisinnaatitsissut akinut fakturamullu paasissutissanut immikkut malittarisassiorsinnaanermut, isumaqatigiissutini ingerlasuni akitsuutinik allannguisinnaanerit, Atuisartoqarnermut Unammilleqatigiinnermullu Aqutsisoqarfiup arlaannaannulluuniit attuumassuteqanngitsumik nakkutilliisarnera aamma nakkutilliinermi pisinnaatitaaffii, kiisalu iliuuserineqartunut kinguneqartitsisarnerit aaqqissuunneqarnissaannut aalajangersakkat)[\[1\]](#) atuutilersitsinissamik aalajangersagaq makkuninnga imaqarpoq:

§ 2

Inatsisartut Inatsisaat atortuulerpoq ulloq 1. januar 2021.

Inuussutissarsiornermut Naalakkersuisoqarfik, ulloq 26. marts 2021

Isak Nielsen Kleist

/

Rannvá Clementsen

[\[1\]](#) Inatsimmi allanngortinneqartumi pineqarput § 17, § 18, imm. 3-5, § 21, § 24, § 39, imm. 1

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut